



SIK-p takorluugai anguniagaalu

Kattuffeqarnikkut

Takorluukkat / Pingaartitat / Anguniakkat

- 1) Kattuffiunissaq nukittoq ilaasortani pillugit atasoq ilaasortaminullu pitsaanerpaamik sullissisoq.
- 2) Naligiissumik tatigeqatigiiffiusumillu sulisitsisut suleqatiginissaat.
- 3) Kattuffimmi ingerlatsiviit assigiinngitsut suleqatigiinnerata nukittorsarneqarnissaa, ilaasortatta nunap immikkoortuini assigiinngitsuni inuuniarnikkut atugarisaasa pitsanngorsarneqarnissaat siunertaralugu.
- 4) Inatsiliornermut sunnuteqarniarnissaq pingaartumik suliffeqarnermut, isumaginninnermut, peqqinnissamut aammalu suliffissaarusimanersiutinut soraarnerussutisqaqarnermullu tunngasutigut.
- 5) Sulisut sinniisaasa nukittorsarneqarnissaat immikkoortortaqaarfiit kattuffiullu allattoqarfiata suleqatigiilluarnesisigut. Sulisut sinniisaat ulluinnarni isumagisassamik-kut nukittorsarneqassapput ilaatigut pikkorissarnernut peqataasarnermikkut.
- 6) SIK-p Inuusuttaasa inuusuttunut suleqatigiiffittut nukittuujunissaa, inuusuttut sulinerminni ilinniarnerminnilu atugarisaat pillugit oqallinnermi peqataalluarluni.
- 7) Ilaasortatta piginnaanngorsarnissaat kajumissaarnissaallu, taamaalillutik sanaartorner-suarmi aatsitassalerinermilu kivitseqataasinnaaniassammata.
- 8) Kalaallit Nunaanni sulisartut kattuffiisa allat suleqatiginerannik nukittorsaanissaq – siunissamilu nuna tamakkerlugu kattuffimmik (LO) pilersitsinissaq.
- 9) Nunani allani sulinermik inuussutissarsiuteqartut kattuffiisa suleqatigiinnerannut iluaqutisseeqatigiiffiusumut isumassarsioqatigiiffiusumullu peqataanissaq.

Inuiaqatigiinni politikikkut

Takorluukkat / Pingaartitat / Anguniakkat

- 1) Akissarsiaqarnermi suliffeqarnermilu pissutsit sullivinnilu avatangiisit toqqissisimanartuunissaat eqqarsaatigalugit angusaqarluarnissaq, soorlu inatsiliornerit isumaqatigiissuteqartarnerillu aqutigalugit.
- 2) Inuiaqatigiit inooqataaffigisatta naligiinnerunissaat kikkullu tamarmik inuunerissaarnissaminnut periarfissaqarnissaat.
- 3) Kikkut tamarmik suliffissaqarnissaat.
- 4) Aalisakkeriviit ilaanni sulisussaaleqilertarnerup aaqqiivigineqarnissaa taamatullu sumiiffinni assigiinngitsuni ilinniarsimasunik sulisussaaleqinerup aaqqiivigineqarnissaa.
- 5) Praktikkerfissat amerlisarneqarnissaat nunami tamarmi suliffinni.
- 6) Suliffeerunnersiutit napparsimanersiutillu pitsanngorsarneqarnissaat.
- 7) Ilaasortatta Danmarkimut noorarnerannut pissutaaqataasartut pissutsit naammaginngitsut iluarsinarneqarnissaat.
- 8) Inissaaleqinerup malunnaatilimmik akiorneqarnissaa. Sulisartut ilaasortarisatta akilersinnaasaannik inissialiortoqarnissaa.
- 9) Boligsikringimik aaqquissuussinerup pitsanngorsarneqarnissaa sulisartunut iluaqutaasumik.

- 10) Peqqinnissakkut akeqanngitsumik isumagineqarsinnaatitaanerup atatiinnarneqarnissaa peqqinnissaqarfiullu pitsanngorsartuarneqarnissaa.
- 11) Nunaqavissut sulisussatut piukkunnarsarlugillu ilinniartinneqarnissaat sulisitsisut suleqatiginerisigut – taamaalilluni suliffissanik ataavartunik pilersitsiortortoqarsinnaaqqullugu nunaqavissut suliffissaannik, tamatumalu peqatigisaanik sulisussanik avataaneersunik pisariaqartitsineq milliartortinneqaqqullugu.
- 12) Sulliviit sulianillu ingerlatsinerit nunatsinni silap pissusianut naleqqussakkamik ineriartortinneqarlutillu aqqissuunneqarnissaat.
- 13) Nunatta pissarititaanik avammut nioqqutissiorsinnaanerup ineriartortinneqarnissaa.
- 14) Atuarfinni ilinniartinnilu ineriartortitsinerup ataqatigiissakkamik pilersaarusionneqarnissaa.
- 15) Sulinermik inuussutissarsiuteqartut atugarisaannik inuiaqatigiinni ilisimasat anner-tusarneqarnissaat. Tamanna ilaatigut pissaaq suliffeqarfinnut ilinniartinnullu sam-misitanik paasisitsiniaasarnikkut.
- 16) Inuiaqatigiit pigisaannik ingerlatseqatigiiffeqarnerup atuuttup atatiinnarneqarnis-saa.
- 17) Sulinermik inuussutissarsiuteqartut suliffinni oqartussaaqataanerisa nukittorsarne-qarnissaat.
- 18) Utoqqaat atugarisaasa pitsanngorsarneqarnissaat, ilaatigut soraarnerussutisiassa-nik ataatsimoortumik aqqissuussinikkut.
- 19) Kalaallit oqaasiisa inuiaqatigiinni allaffissornermilu qitiutillugit atorneqarnissaat. Inuusaaserput kulturikkullu toqqammavivut pingaartinneqassapput. Tamatuma peqatigisaanik nunarsuarmioqataanerput ilisimaarissavarput nunanullu allanut at-taveqarluarnissamik ineriartortitsilluta.
- 20) Nunatta inumminit tamakkiisumik oqartussaaffigineqalernissaa tamakkiisumillu namminersulernissaq anguniagaavoq tamanna aningaasaqarnikkut illersorneqar-sinnaalerpat. Inuiaqatigiillu tamarmik peqataatinneqassapput tamakkiisumik nam-minersulernissap sulissutigineqarnerani.

Sulinermik Inuussutissarsiuteqartut Kattuffiat (SIK),

decembari 2019